



Provedimaint central da chalur, proget Runatsch/ Palü - decisiun da princip e surdatta da lavur impressari

Il proget dal schlargiamaint dal provedimaint central chalur in Runatsch e Palü es gnü surlavurà. Il schlargiamaint es pussibel sainza stuvaiv dozar la capacità illa centrala in Cul. Al listess mumaint as voul optimar e fabricar oura la rait electrica e da fibr'optica. La suprastanza cumünala ha surdat las lavurs d'impressari a la firma Bagger Cello GmbH, Zernez.

Planisaziun generala provedimaint d'aua (GWP) - decisiun da princip e decisiun da submittents

Per garantir eir in avegnir ün provedimaint d'aua adequat a las pretaisas d'ota qualità e pudair planisar las drettas investiziuns esa necessari d'elavurar üna strategia complessiva. Il plan general dal provedimaint d'aua (GWP – Genereller Wasserplan) es la basa ed il mez per garantir quist. La planisaziun evaluescha il stadi actual e definischa masüras per optimar il manaschi, la controlla, il mantegnimaint e la planisaziun d'investiziun. Investiziuns aint il provedimaint d'aua sun complexas e colliadas cun fich gronds cuosts. Our da quist scopo esa indispensabel d'avair la dretta strategia per planisar il dret mumaint las drettas masüras ed evitar investiziuns falladas. La suprastanza cumünala ha dat glüm verda a l'inizi dal proget ed approvà la glista da submittents.

Zernez, SIE Laschadura 2 - decisiun da princip e decisiun da submittents

La via da god Laschadura es in ün nosch stadi ed üna sanaziun e refacziun es necessaria (schlargiamaints punctuals, adattamaints dal access pro la via chantunala, divers spalüdamaints, rimplazzamaints punctuals da la vetta fina, mürs da sustegn). Cun la sanaziun previssa es garantida eir pel avegnir üna cultivaziun dal God da las Chasettas, God da Crusch e God Curtinè. Implü vain garanti ün access sufficiaint al temp d'hoz per l'Alp Laschadura. Dürant l'on 2022 es gnü realisà la prüma etappa «SIE Laschadura 1». Il gremi ha acconsenti l'inizi dal proget e la glista da submittents per las lavurs descrittas.

Sanaziun sarinera Zernez - proget da fotovoltaica - decisiun da princip e decisiun da submittents

In connex cun la fabrica da la sanaziun da la sarinera a Zernez e cun quai cun la fabrica dal nouv stabilimaint plü grond vaiva la suprastanza cumünala decis i'l 2022 da vulair stabilir sül tet e per part vi da la fatschada da quel stabilimaint nouv, ün indriz da fotovoltaica per prodüer forz'electric. Quist principalmang per cuvernar raduond 70% dal consüm da forz'electric da la sarinera. La suprastanza cumünala ha acconsenti la dumonda da princip e la glista da submittents per las diversas lavurs.

Rimplazzamaint tractor e remuorch da laina - decisiun da princip

Il tractor Fendt cul remuorch da la laina da las Gestions Tecnicas ha daspö il 2014 fat bundant 10'000 uras da lavur ed es uossa da rimplazzar. La dumonda da princip es gnüda sancziunada da la suprastanza cumünala. La submissiun po uossa gnir iniziada.

Plazza da giovar Lavin (donaziun Saluz) - decisiun da princip

Causa cha la plazza da giovar da Lavin es in ün nosch stadi e la plazza da sport ha dabsögn d'adattamaints es gnü elavurà ün proget complessiv. Id es previs da realisar üna nouva plazza da giovar tenor directivas da sgürezza actualas e da montar raits davo ils goals pro la plazza da sport. Quist'investiziun po gnir realisada our da la donaziun Saluz chi sta a disposiziun per progets a favur da la fracziun da Lavin. Il gremi ha approvà l'inizi dal proget.

Plan da quartier Ils Muots Brail - decisiun da prosegumaint

In connex cul proget d'infrastructura in Ils Muots vest a Brail es gnüda sü la dumonda resp. la problematica da la planisaziun da quartier veglia, chi datescha dals ons 1980, dimena vers 40 ons veglia. Il Cumün da Zernez ha l'intenziun da vulair schoglier il plan da quartier Ils Muots a Brail sainza rimplazzamaint. La publicaziun uffiziala cun quist'intenziun vegn uossa manada tras. In seguit a la pussibilità da far recuors cunter quist'intenziun gnarà la suprastanza cumünala a decider definitivamaing sur dal schoglaimaint dal plan da quartier Ils Muots a Brail.

Manader Gestions Tecnicas - decisiun

La suprastanza cumünala ha elet a partir da subit a Carlo Bott sco manader da la secziun da las Gestions Tecnicas e cun quai eir sco commember da la direcziun operativa. El es inavant respunsabel per la gestiun forestala. Livio Conrad es gnü elet sco seis rimplazzant ed es inavant respunsabel per la sparta da l'infrastructura cumünala. Il pensum da lavur vacant daspö la stà 2022 nun ha pel mumaint da gnir rimplazzà.

Büro electoral per las votaziuns chantunalas e federalas dals 12 marz 2023

La suprastanza cumünala ha elet il büro electoral per las votaziuns dals 12 marz 2023. Al büro electoral fan part: Domenic Toutsch sco president, Duosch Städler, Jürg Wirth e Corsin Scandella sco actuar.

Statistica sezzüdas, radunanzas e votaziuns 2022

La supranza cumünala es gnüda orientada sur da la quantità da sezzüdas e tractandas da l'on 2022. La direcziun operativa ha trattà 423 tractandas in 25 sezzüdas, la supranza cumünala 218 tractandas in 16 sezzüdas. In duos radunanzas cumünalas han votantas e votants decis sur dad 8 tractandas. Dürant l'on 2022 haja dat quatter votaziuns resp. elecziuns a l'urna.